

# I CONGRESO



Convergencia **xxi**

# RELATORIO ESTATUTARIO

# **I CONGRESO CONVERXENCIA XXI**

## **RELATORIO ESTATUTARIO**

### **Título Preliminar**

Converxencia XXI aspira a ser un instrumento ao servizo de Galicia e de todas as persoas que queren traballar na construción dun proxecto político adaptado e pensado para as necesidades e ambicións do noso país, que teñen fe no seu futuro e que confían nas súas posibilidades. Converxencia aspira a ser o punto de encontro de todos e todas as que teñan ilusión por construír unha Galicia mellor dende un pensamento autónomo e non subsidiario; dende a autoestima e non dende a falta de confianza das nosas capacidades. O punto de encontro onde converxan os homes e mulleres que queiran construír unha Galicia máis democrática e participativa, e que queiran facelo dende a integración e non dende o sectarismo, desde unha visión colectiva ao servizo do desenvolvemento das persoas, e de todos os que queiran ver unha Galicia plenamente integrada no mundo globalizado do século XXI e que crean na importancia que a iniciativa persoal ten para o logro deste fin.

Dende o punto de vista democrático non pode haber ningún límite de decisión máis ca o que o pobo galego, voluntariamente, queira definir para o seu marco xurídico e político. Apostamos por unha profundización do autogoberno de Galicia e por un recoñecemento da realidade plurinacional de España, que poida, nun futuro próximo, adoptar a fórmula xurídica dunha confederación.

A seguir preséntase unha definición ideolóxica base que se desenvolverá e concretará nas condicións que dispoñan os sucesivos congresos do partido. Converxencia XXI é unha forza política que se define como galeguista, europeísta, democrática, liberal no social e no económico, con sensibilidade social, aconfesional, e que ten como obxectivo a defensa dos intereses colectivos de Galicia co fin de xerar as mellores condicións para o desenvolvemento individual dos seus habitantes.

Converxencia XXI

a) Confía plenamente na Democracia, na Liberdade e nos Dereitos Humanos. A Democracia é o mellor sistema para garantir as liberdades individuais, a convivencia, o benestar e a prosperidade, e por iso a nosa sociedade debe fortalecela e traballar na súa continua profundización.

b) Cre que a mellor maneira para fortalecer unha sociedade vertebrada e próspera é potenciar a economía de mercado e a libre competencia. Un sistema económico respectuoso co contorno natural que incentive o esforzo e a creatividade, auténticos xeradores de traballo, riqueza e benestar. Ademais reconece o papel que a libre empresa e o fomento do espírito emprendedor deben xogar no progreso e dinamismo do País.

c) Acredita na potenciación da identidade de Galicia para alcanzar un marco no que a cidadanía galega poida desenvolver ao máximo as súas potencialidades individuais.

d) Defende o plurilingüismo como valor estratéxico cultural e económico e considera que a lingua galega, propia de Galicia, debe ter a mesma consideración xurídica que a outra lingua co-oficial, o castelán. Considera tamén a igualdade de dereitos dos galego-falantes. Ademais o partido resalta a necesidade de aproveitar as enormes vantaxes da gran afinidade lingüística cos países de fala portuguesa.

e) Atribúe á sociedade civil galega un rol central no desenvolvemento económico e social do país.

f) Defende un ensino e unha sanidade de acceso universal e de calidade como elementos de vertebración básicos da sociedade e como garantes da igualdade de oportunidades.

g) Considera que as institucións deben promover a integración e fortalecer a igualdade de oportunidades das persoas en condicións desfavorables. Ademais deben garantir a dignidade e a calidade de vida dos dependentes e protexer a natalidade e a familia no sentido máis amplo e heteroxéneo da palabra.

h) Cre que cómpre acadar un crecemento respectuoso co medio natural e desenvolver políticas que melloren e preserven este patrimonio para as xeracións futuras.

i) Reconece o papel positivo que xogou a Constitución Española de 1978, e constata que está ao servizo da cidadanía, mais acha que pode ser reformada en función dos intereses e preferencias da cidadanía española e galega.

l) Aposta por unha reforma que simplifique e reforce a administración local, pola profundización e ampliación do autogoberno en Galicia, polo recoñecemento da realidade plurinacional de España e pola consolidación do proxecto común europeo.

## **Título I. Dos principios do partido**

**Artigo 1.** Convergencia Vinte e Un (C.XXI) estrutúrase e organízase como partido sobre os principios de democracia interna, da participación e da disciplina nas decisións do partido.

**Artigo 2.** O galego é a lingua oficial de Convergencia, toda a súa comunicación oral externa e escrita externa e interna terá que ser feita neste idioma para demostrar o noso compromiso coas liberdades individuais e a igualdade de oportunidades dos galegofalantes, algo que hoxe non se dá de ningunha maneira na nosa sociedade e como unha forma de reivindicar o dereito á igualdade xurídica de galego e castelán. Como partido de inspiración liberal a lingua na que falen os nosos afiliados na súa vida privada non é da nosa incumbencia.

**Artigo 3.** O ámbito territorial de actuación de Convergencia XXI é o da Comunidade Autónoma de Galicia. Ademais, o partido organizarase no exterior de Galicia nas agrupacións que determine a executiva nacional.

**Artigo 4.** Será a executiva nacional a encargada de determinar a sede social do partido. En todo caso, a pretensión é que a sede estea localizada en Santiago de Compostela como capital do noso País. A executiva nacional tamén poderá modificar a sede social, o logotipo do partido así como establecer as delegacións, dependencias e oficinas que o funcionamento do partido requira.

## **Título II. Da afiliación a Convergencia XXI**

### **Capítulo I. A afiliación**

**Artigo 5.** Para facer parte de Convergencia XXI serán condicións indispensables:

- a) aceptar os principios xerais.
- b) actuar conforme aos estatutos.
- c) observar a disciplina do partido.
- d) non militar en ningún outro partido político. En caso de militancia previa noutro partido de ámbito nacional ou estatal, será necesario achegar copia da carta de solicitude de baixa.
- e) estar ao corrente do pago domiciliado da cota mínima fixada pola executiva nacional, sen perxuízo das excepcións que se determinaren.
- f) ter máis de dezaseis anos.

**Artigo 6.** A admisión en Convergencia XXI é competencia da executiva nacional.

**Artigo 7.** Os afiliados teñen os seguintes dereitos:

- a) participaren no congreso, directamente ou a través dos seus delegados, na forma que estipule a executiva nacional para cada congreso.
- b) participaren na vida política e nas actividades que organice Convergencia XXI en todos os niveis previstos neste estatuto.
- c) defenderen as súas opinións con voz e con voto nas reunións dos órganos a que estean adscritos e na forma que se estableza regulamentariamente. Na quenda aberta de palabras dunha asemblea local, os militantes poderán propoñer temas a debater que, de seren aceptados por unha maioría dos asistentes, deberán figurar na orde do día da seguinte asemblea local.

- d) exercerem o dereito a elixir e a ser elixidos, cos requirimentos regulamentarios pertinentes, para cargos internos ou de representación política.
- e) recibiren e demandaren información plural sobre a actividade de Convergencia XXI.
- f) elevaren consultas e propostas aos diferentes órganos de Convergencia XXI.
- g) recibiren formación que lles axude a desenvolver mellor a súa actividade política.
- h) recibiren, por parte do partido, asistencia técnica ou xurídica na defensa dos actos que derivaren do correcto exercicio dos seus cargos electos, presentes ou pasados.

**Artigo 8.** Os militantes teñen os seguintes deberes:

**1.** De carácter xeral:

- a) respectaren os principios básicos e os Estatutos, así como os acordos validamente adoptados polos órganos de Convergencia XXI.
- b) contribuíren ao esforzo colectivo de toda a organización para a consolidación dos seus obxectivos programados.
- c) renderen contas do traballo feito, en tanto que cargos internos e públicos, perante o órgano que corresponda pola súa función ou adscrición territorial.
- d) desenvolveren, de acordo coas posibilidades persoais, unha actividade continua dedicada aos obxectivos do partido. Procuraren difundir os obxectivos e a actividade do partido co fin de que outros cidadáns os coñezan, de que os compartan e de que se comprometan con Convergencia XXI.
- e) participaren activamente nos procesos electorais, cun interese destacado na colaboración para o servizo cívico de interventor.
- f) asistiren ás reunións dos grupos territoriais, sectoriais ou de traballo aos cales estean adscritos, e levaren a termo as tarefas asignadas ou asumidas.
- g) gardaren discreción nas materias reservadas.
- h) manterem unha conduta ética na acción política.
- i) pagaren a cota. Serán determinadas regulamentariamente as excepcións que procedan.

**2.** De carácter específico:

- a) a militancia que ocupe cargos de representación ou de elección no partido deberá asistir a todas as reunións a que sexa convocada por razón do cargo.
- b) a militancia que ocupe cargos de responsabilidade pública e de confianza política, en especial os cargos electos con dedicación exclusiva, deberán ter formación. O comité executivo a que pertencen será responsable da súa coordinación.
- c) considerarase como un valor engadido para aqueles militantes que opten a cargos de responsabilidade, tanto pública como de representación interna, que participasen nas institucións cidadás.

**Artigo 9.** A condición de afiliado perderase:

- a) por vontade propia e logo de o comunicar por escrito.
- b) como resultado de expediente disciplinario de acordo coas normas correspondentes establecidas no Título V.
- c) por impagamento das cotas durante seis meses.

d) por defunción.

e) por presentarse nunha lista electoral por calquera opción ou candidatura que compita con aquelas que presente Convergencia XXI.

## **Capítulo II. Os simpatizantes**

**Artigo 10.** A Executiva Nacional poderá dispor dun rexistro de simpatizantes aos que se lles informará das actividades do partido. Ademais, a Executiva Nacional poderá recadar a opinión dos simpatizantes en procesos de decisión interno, cando así o considere necesario.

## **Título III. Órganos de encadramento, actividade e participación**

### **Capítulo I. Normas xenéricas**

**Artigo 11.** Cada afiliado intégrase nunha agrupación local no caso de que estea constituída.

**Artigo 12.** Dentro dos corenta e cinco días naturais posteriores á celebración dun congreso ordinario terán que ser renovados todos os cargos electos do partido. En todo caso, teranse que facer eleccións nos corenta e cinco días seguintes de se producir a vacante dun cargo unipersoal. Todos os procesos electorais dentro de Convergencia XXI serán feitos de acordo co regulamento básico de eleccións.

**Artigo 13.** Todas as eleccións de cargos unipersoais serán secretas.

**Artigo 14.** Nas eleccións a nivel local, de agrupación, as candidaturas á presidencia farán unha proposta de comité ou secretariado, que será votada conxuntamente e no acto, sen perxuízo do dereito de calquera afiliado elixible a presentarse individualmente. No suposto de que sexa unha soa candidatura, esta deberá conseguir máis do 50% dos votos.

**Artigo 15.** Un afiliado non pode tomar posesión do cargo para o cal foi electo sen notificalo previamente á executiva nacional. A persoa cesante debe exercer as funcións propias do cargo até que o acto da toma de posesión teña lugar, ou até que pasen dous días desde a elección de quen a substitúa.

**Artigo 16.** Para a destitución ou separación de calquera afiliado que ocupe un cargo electo dos comprendidos dentro deste título, requírese da presentación previa dunha moción razoada de destitución, coa sinatura no mínimo dun 20% do censo correspondente, alén da maioría absoluta dos votos da militancia presente na asemblea. Se a moción non obtivese os votos necesarios, non poderá repetirse até seis meses despois. Cando se produce a dimisión, destitución ou separación da presidencia dun comité executivo, os membros do mencionado comité, electos a proposta súa, cesarán. Os membros de todos os órganos colexiados de Convergencia XXI que figuren nos presentes estatutos, representen o ámbito ou institución que representen, deberán ser afiliados do partido.

**Artigo 17.** Os órganos colexiados executivos reuniranse como mínimo cada mes; as asembleas locais de afiliados reuniranse como mínimo semestralmente. Ambos órganos poderanse reunir de maneira extraordinaria sempre que o decida a presidencia ou o demande a quinta parte dos seus compoñentes.

**Artigo 18.** É obrigatorio levantar acta de todas as xuntanzas. Os acordos tómanse por maioría simple, agás nos casos onde, estatutariamente, se establezan quorums ou maiorías especiais.

**Artigo 19.** A dirección do partido ten que dispor dos medios necesarios para realizar as súas tarefas. A dirección e os outros órganos colexiados executivos terán que redactar planos de acción para impulsar, coordinar e optimizar a súa actividade.

## **Capítulo II. Organización territorial**

### *A. As agrupacións locais*

**Artigo 20.** O núcleo territorial básico da militancia é a agrupación local, organizada en base aos concellos. Os militantes que pertencen a concellos onde non se poida artellar unha agrupación, poderán colaborar mutuamente coas agrupacións veciñas co fin de gañar en operatividade, no caso de estimarse conveniente por parte da executiva nacional, e mentres que esa precariedade numérica se manteña. Ademais, existirán agrupacións na emigración, coas adscricións que determine a Executiva nacional.

**Artigo 21.** Cada agrupación local terá un Secretario Local coas funcións que se determinen regulamentariamente.

**Artigo 22.** Cada agrupación local que tiver polo menos dez membros, deberá contar cos seguintes órganos:

a) *A asemblea local.*

A asemblea local está constituída por toda a militancia adscrita da localidade, e a ela corresponde:

- Elixir o Secretario Local, e por proposta desta, o comité executivo local.
- Ratificar ou desautorizar a actuación do Secretario Local ou do comité executivo local.
- Avaliar o traballo do partido, especialmente no seu ámbito de actuación territorial.
- Aprobar o programa electoral municipal.
- Avaliar o traballo do grupo municipal.
- Elixir as persoas delegadas para o congreso que corresponda.
- Aprobar os candidatos que correspondan ás eleccións municipais.

b) *O comité executivo local.*

O comité executivo local está formado polo Secretario Local e o equipo de persoas oportuno para o desenvolvemento das tarefas propias da agrupación local, entre as que contará coas persoas que se ocuparán das seguintes funcións: acción política, acción territorial e municipal, acción de militancia e participación.

Tamén fai parte do comité executivo local a persoa que exerza de voceiro do grupo municipal do concello, sempre que for militante de Convergencia XXI, e se este non for o caso, outra persoa que for militante e tiver a condición de membro do grupo municipal. Son membros natos do comité executivo local as persoas que posúan a condición de membros da Executiva Nacional. Tamén poderán participar o conxunto de membros do comité executivo da agrupación que fosen militantes da agrupación local.

O comité executivo local é o máximo órgano permanente de acción política no nivel municipal. No seu ámbito é directamente responsable da organización e administración do partido.

Correspóndelle ao comité executivo local:

- representar, organizar, coordinar e dinamizar o partido no seu ámbito de actuación territorial.

- executar os acordos da asemblea local.

- proporlle accións políticas á asemblea local.

- responder e informar periodicamente á asemblea local.

- apoiar os seus concelleiros, coordinando a súa actuación coa do grupo municipal.

- recoller sistematicamente as propostas, iniciativas e estudos, aplicándoos á acción política municipal ou incluíndoos no seguinte programa Municipal.

- facer o seguimento do cumprimento do programa electoral municipal.

- facer o seguimento e a execución das campañas electorais no seu ámbito de actuación territorial.

- consultar os diferentes órganos regulamentarios de Convergencia Vinte e Un naquelas cuestións en que os seus coñecementos específicos poidan ser de interese.

- organizar cursos de formación para a militancia e cargos públicos.

- recibir e transmitir información do partido e da política xeral desde a base á dirección e viceversa.

- recoller as iniciativas, suxestións e críticas da militancia e da sociedade no seu ámbito de actuación territorial.

- realizar actividades para dar a coñecer o partido á cidadanía, así como facela participar das actividades que foren feitas.

- reunirse periodicamente cos compoñentes da lista municipal.

- tramitarlles aos órganos superiores do partido aqueles acordos tomados polo propio comité ou asemblea local en asuntos que non estean ao seu alcance. Tamén aquelas iniciativas, suxestións e críticas recibidas da militancia e de persoas simpatizantes en asuntos que sobrepasen o propio ámbito municipal.

A Executiva nacional facilitará, a través dunha función específica, a coordinación das distintas agrupacións locais e, nomeadamente, facilitará a afiliación que non estea integrada nunha agrupación local recursos para recibir e transmitir información do partido e da política xeral desde a base á dirección e viceversa; recoller as iniciativas, suxestións e críticas da sociedade no seu ámbito de actuación persoal, e realizar actividades para darlle a coñecer o partido á cidadanía.



## *B. As comisións coordinadoras de distrito electoral*

**Artigo 23.** Con motivo das convocatorias electorais das eleccións autonómicas e xerais, a Executiva Nacional deberá nomear para cada distrito electoral unha Comisión Coordinadora de Distrito Electoral.

# **Título IV. Órganos centrais de representación e dirección**

## **Capítulo I. Dos órganos do partido**

**Artigo 24.** A representación, administración, xestión e dirección política de Convergencia XXI é ostentada polos seguintes órganos:

- o congreso
- a executiva nacional
- a secretaría xeral

**Artigo 25.** A máxima representación da vontade de Convergencia XXI é ostentada polo congreso, composto polos compromisarios que representarán a militancia do partido.

**Artigo 26.** Correspóndelle ao congreso:

- elixir os membros da executiva nacional.
- aprobar o informe de xestión da dirección saínte e debater e aprobar os relatorios.
- ratificar os pactos orgánicos.
- aprobar ou modificar estes estatutos.
- decidir no tocante ás propostas de federación, fusión e disolución do partido.

**Artigo 27.** O congreso terá que convocarse como mínimo cada dous anos. A convocatoria será feita cunha antelación mínima de corenta días naturais, a proposta da executiva nacional. De maneira obrigatoria, o congreso deberá reunirse con carácter común nun prazo non superior a trinta meses desde a última convocatoria. Se for pedido pola metade dos afiliados, o congreso será convocado con carácter extraordinario nun prazo máximo de trinta días e cunha orde do día limitada aos temas para os cal foi feita a convocatoria. Os acordos do congreso serán por maioría simple, agás nos puntos referidos á fusión, coalición, federación ou disolución do partido.

## **Capítulo II. Da executiva nacional**

**Artigo 28.** A executiva nacional é o órgano de execución emanado do congreso. Correspóndenlle as seguintes funcións:

- a dirección do partido conforme ao sinalado polo congreso.
- a representación do partido en todos os ámbitos legais.
- a representación común do partido.
- convocar, no caso de se estimar oportuno, a Conferencia Política como órgano de debate entre congresos do partido.

A Executiva Nacional está composta polos membros que o congreso elixa, en lista pechada e bloqueada, e nun número non inferior a cinco nin superior a dez. Terá que contar, como mínimo, cun secretario xeral, elixido polo congreso, que será aquel que encabece a lista máis votada; e cun responsable de finanzas, que terá que constar como tal nas listas que fosen presentadas.

**Artigo 29.** A executiva nacional reunirse, como mínimo, unha vez por mes con carácter ordinario, ou con carácter extraordinario se así for folicitado polo secretario xeral ou pola maioría dos seus membros, por medio dun escrito motivado que inclúa a orde do día da xuntanza.

### **Capítulo III. Da secretaría xeral**

**Artigo 30.** Corresponde á secretaría xeral:

- a dirección das funcións executivas do partido marcadas polo congreso e a executiva nacional.
- as funcións de xestión do partido, que poderá delegar nos membros da executiva.
- a representación pública e xurídica en toda clase de actos e contratos para a realización dos acordos da executiva nacional.
- en caso de empate nas deliberacións da Executiva Nacional, o Secretario Xeral disporá dun voto de calidade.

### **Capítulo IV. Do secretario de finanzas**

**Artigo 31.** Corresponde ao secretario de finanzas:

- a manutención ordenada do estado fiscal do partido.
- a custodia, protección e xestión do acceso ás contas financeiras do partido, en colaboración co secretario xeral.

## **Título V. Do réxime disciplinario**

**Artigo 32.** As faltas clasifícanse en moi graves, graves e leves.

**Artigo 33.** Son faltas moi graves as seguintes:

- o incumprimento dos deberes que impoñen os estatutos, os regulamentos e as decisións dos órganos do partido.
- a negación pública e explícita dos principios e finalidades do partido, especificadas nestes estatutos.
- a militancia noutro partido político.
- a reincidencia en dúas ou máis faltas graves no mesmo ano.
- a comisión de delitos incompatibles co decoro da imaxe pública do partido.

As sancións para as faltas moi graves serán algunha ou algunhas das seguintes:

- suspensión temporal do cargo de elección que ostente dentro do partido.

- cesamento do cargo de elección que ostente.
- suspensión dos dereitos de militancia no grao que se determine.
- expulsión do partido.

**Artigo 34.** Son faltas graves as seguintes:

- faltar ao respecto aos compañeiros do partido de maneira ostentosa ou inxustificada.

As sancións para as faltas graves serán algunha ou algunhas das seguintes:

- suspensión temporal do cargo de elección que ostente o afiliado dentro do partido.
- cesamento do cargo de elección que ostente o afiliado dentro do partido.
- suspensión dos dereitos de afiliación no grao que se determine.

**Artigo 35.** Son faltas leves as seguintes:

- a ausencia de asistencia a unha xunta dos órganos de dirección do partido sen causa xustificada.

- alterar a orde das xuntas.

As sancións para as faltas leves serán algunha ou algunhas das seguintes:

- amoestación verbal ou escrita.
- expulsión da xunta.

**Artigo 36.** A potestade disciplinaria para as faltas graves e moi graves correspóndelle á executiva nacional. Os comités locais terán esa potestade para as faltas leves.

**Artigo 37.** En cada apertura de expediente disciplinario, o afiliado deberá ser cumpridamente notificado; terá un prazo de quince días naturais para fornecer as probas que considere oportunas para a súa defensa, e o mesmo prazo de quince días naturais para a interposición de recurso diante do órgano correspondente en función do tipo de falta.

## **Título VI. Do réxime económico e administrativo**

**Artigo 38.** Convergencia XXI non dispón de patrimonio fundacional. Os seus recursos económicos proveñen de:

- os diferentes tipos de cotas ordinarias da militancia. As cotas son fixadas pola executiva nacional.
- as cotas extraordinarias que acorde a Executiva Nacional para atender gastos extraordinarios.
- os subsidios, legados e doazóns que legalmente se puideren producir a favor da Convergencia Vinte e Un.

**Artigo 39.** A Executiva Nacional informará anualmente os afiliados de Convergencia XXI da situación económico-financeira do partido.

A xestión económica de Convergencia XXI guiarase por criterios de transparencia, e faranse públicas as súas contas.

**Artigo 40.** A dirección e xestión da operativa económico-financeira será responsabilidade do secretario de finanzas do partido.

## **Título VII. Coalición, federación, fusión e disolución**

**Artigo 41.** As coalicións electorais con outras forzas de ámbito nacional, estatal ou europeo serán aprobadas pola Executiva Nacional por maioría absoluta.

**Artigo 42.** A federación ou fusión da Convergencia XXI con outra forza política esixirá o voto favorable de tres quintas partes dos delegados dun congreso extraordinario que sería convocado con tal fin pola Executiva Nacional.

**Artigo 43.** A disolución do partido só pode ser acordada en congreso extraordinario co voto favorable de dous terzos dos delegados. En caso afirmativo, o Congreso adoptará as decisións relativas á liquidación de bens, dereitos ou calquera asunto pendente.

## **Título VIII. Do réxime documental**

**Artigo 44.** Será obrigatorio para cada un dos órganos de Convergencia XXI manter un réxime documental que comprenderá os libros de rexistro de afiliados, de actas, de inventarios e de contabilidade.

## **Título IX. Das mocidades de Convergencia Vinte e Un**

**Artigo 45.** Se a Executiva Nacional así o acordar crearanse as mocidades de Convergencia XXI. Todos os afiliados a Convergencia menores de vinte e seis anos serán considerados afiliados das mocidades no caso de que a Executiva Nacional decida crealas. As xuventudes non poderán ir en contra do ideario e as liñas estratéxicas do partido. Se fosen creadas as mocidades de Convergencia XXI deberán ter representación nos órganos de dirección do partido de acordo coa seguinte proporción mínima:

- un representante na executiva nacional.
- un representante nos comités executivos locais.